

سَمَاعَاتِ الْوَدَانِ

إنت فَاكر تقطية الحَاجب

معناها إنه شَرير؟

ده مكشَر

من المشي الكثير

والتفكير

ومحاولة تدبير

اللي ما بيتدبرش.

وصاحب الابتسامه ده

مقيم شعائر

مش طيب

ده مستخبي ورا «ماسك»

ولا حد يقدر يعارضه

مروج إشاعات محترف.

كنت فاكرك أذكي

وبتعرف تميّز.

الخدع بقت كثير.

أنا مش رايح أي مكان

لإني عارف إني مش راجع

ولإني حاسس إني مش قوي

لازم أتكلم

دي أكثر حاجة مريجة

أتكلم

سامعني؟
لو نظرة تناديلك.
كل النظرات تستغلك.
لما باقعد
أسند إيدي على راسي
وأغمض
بعد دقيقة
بابقى مش عارف أنا في أي مكان.
سماعات الودان
صاحيتي
هي اللي بتعمل مكاني.
لما بتتعطل بافقد أهم شيء:
وحدتي
ودي ما بتعرفش المشاركة
سلام.